

peiner, afin qu'en agissant du corps, le froid & le vent ne les fist geler tout debouts.

Mais ô bonté diuine, qui n'abandonnés iamais les vostres iusques au dernier point, alors qu'ils pensoient estre perdus vous les secourustes par le moyen du bon Pere Paul Huet comme ie diray presentement. Ce bon Religieux ayant dit les Vespres à la Chapelle de Kebec, comme nous auions accoustumé toutes les Festes & Dimanches, monta sur la montagne pro-  
|| chaine pour voir s'il descouuriroit nos voyageurs 105  
comme il fist de fort loing. Les ayans apperceus comme un autre Abraham qui se tenoit sur les chemins pour accueillir les pelerins, il accourut promptement au Conuent prendre un peu d'eau de vie avec un peu de vin que l'on garde exprés pour semblables necessités, qu'il leur porta en grand haste, & à mesure qu'il en rencontroit quelqu'un, il luy donnoit un peu de ses rafraischemens & le consoloit au mieux qu'il luy estoit possible iusques au Pere Irenée, qui estoit des derniers, auquel ayant donné un peu de vin, comme reuenu d'une extase, les larmes luy en tomberent des yeux à grosses gouttes, ou d'ayse, ou d'estonnement, car comme il m'a dit luy mesme, ce petit doigt de vin tres rare dans le pays fist comme un miracle en luy, le changeant tout en un autre homme, & de plus le bon Pere Paul se chargea de son paquet iusques au Conuent où ils arriuerent sur le soir fort heureusement, à leurs maux passez prés.

Il est tres veritable que Dieu faiçt des graces particulieres à ceux qui vont entre les Infidelles, qu'il ne faiçt pas à ceux qui demeurent en leur maison, &